

新纂雲南通志卷一百六十五目錄

外交考二

中英交涉一

馬嘉理案

中英緬甸之交涉



新纂雲南通志卷一百六十五

外交考二

中英交涉一

馬嘉理案

緬甸與我國交通其載諸條約上者實自光緒二年中英芝罘條約始按締結此約之原因係由英人馬嘉理被戕事件英國藉端迫我簽訂者英國蓄意欲由印度至滇開通陸路設領事通商漸肆蠶食之謀匪伊朝夕西曆一八七四年駐華英公使威妥瑪 (Thondstra-Hgis, wadeo) 接印度總督來文云有英官欲由緬甸至雲南省再由雲南進京請由總理衙門發給護照並由京派翻譯官一員到雲南緬甸交界處所等候總署以英人請照遊歷載在條約同治七年間

英人唐古巴由印度前赴川滇粵等省亦准給照有例在先故仍照案發給馬嘉理護照一面並函致滇督量爲照料並囑英人遊歷蓄意甚深留意預伐其謀光緒元年正月二十六日英使函稱馬嘉理安抵緬甸蠻莫通行無阻迨與印度探測隊長柏郎由緬至滇隨帶緬兵洋兵多人紳民間聽謠傳聚團自衛意在善意勸阻而馬嘉理不聽入滇探測致關外匪徒野人乘機劫殺馬嘉理二月六日英使照會我國謂翻譯官馬嘉理被雲南騰越官戕害之事現由英國朝議大臣集議總署以英使詞意叵測必藉端要挾乃奏派大員查辦英使態度極強提議觀審人犯若弗照所提出意見即從此絕交滇督岑毓英川督李瀚章等奏明馬嘉理實係死於野人而非死於華民英使特肆意要挾據川督李瀚章奏云揣英使威妥瑪之意要索



甚奢特借滇案爲樞紐如得贖其欲滇案究易了結如所求未遂無論何等辦法始終挑剔所言確是的論蓋英使所要求澈查本案之重要關鍵如馬嘉理被戕柏郎被阻之主使及犯証供詞均經李瀚章調查明確無誤然威妥瑪認此事根源由於朝廷大吏均以攘外爲心而其要求在懲辦滇督岑毓英及擴張商務兩點並即一面聲明南下一面提出六項辦法一總督奏述惋惜馬嘉理並曉諭保護洋人二英人前往視察曉諭三中國人傷害英人案件時准英國派員觀察四滇省邊界商務派員會商五英國派員在雲南大理府或他處駐居四川重慶府亦然六多開口岸總署對此未完全同意英使遂過津與李鴻章晤面不允續議即南下總署恭親王奕訢因交涉無效奏請整頓江海防務李鴻章鑒於當時人才財政均無把握

不宜因滇事與英失和清廷不得已依英使提案派李鴻章爲全權代表會英使於芝罘即烟台於光緒二年締結芝罘條約其重要條約除確定英國在華領事裁判權及宜昌蕪湖溫州北海重慶開爲通商口岸外其關於雲南者如下

所有滇省邊界與緬甸地方來往通商一節應如何明定章程於滇案議決摺內一并請旨飭下雲南督撫俟英國所派專員赴滇後即選派妥幹人員會同妥爲商訂

原約第一款

自英曆來年正月一日即光緒二年十一月十七日起定以後年爲限由英國選派官員在滇省大理府或其他處相宜地方一區駐寓查看通商情形俾商訂章程得有把握並於關係英國官民一切事宜由此項官員與該省官員隨時商辦或五年之內或俟



期滿之時由英國斟酌日期開辦通商至本年所議由印度派員赴滇曾經發給護照應仍由印度節度大臣隨時定奪派員妥辦右列條款爲最不公平者蓋瑪嘉理不過一書記官其到滇之目的實爲導引探測隊窺查滇情既被土人所戕即使我國表示寬懷亦只限於相當撫卹乃芝罘條約中英使竟要求重大賠償多開商埠擴張領事裁判權實屬罕聞惟自茲約成立中緬之商務關係遂爲條約上之開端又此案解決條件之一由中國派專使赴英道歉清廷委派郭嵩燾任此職中國設駐外使館實自此始此事私家紀述頗多以非正式公牘故不錄

附欽差大臣調四川總督李瀚章前侍郎薛煥等奏

光緒二年三月二十六日即一八七六年四月二十

竊臣等自上年十月到滇後提訊戕害馬加理之犯供並密查卸署都司李珍國顯有計阻英員之意當經據實奏參奉旨李珍國著先行革職分別研鞫等因欽此數月以來臣等督飭奏調道員丁士彬知府蔣銘勳等會同雲南布按兩司更番審訊後由臣等親提審問現經英國參贊格維納等來滇觀審訖謹將全案顛末及查究情形詳悉具奏查馬加理於同治十三年十一月到滇先經兼署雲南督臣岑毓英遵照總理衙門文函飭屬妥護已革騰越總兵蔣宗漢已革騰越同知吳啟亮奉文後商派都司徐成林迎護到騰會晤款洽仍派兵役護送出境馬加理瀕行有致蔣宗漢謝函爲証訊據蔣宗漢吳啟亮供稱馬加理只言往迎柏郎並無何日回騰囑令迎護說去後亦無文函知會等語此馬加理初



次過騰平安出境之情形也馬加理由騰赴緬境新街後與柏郎會合初擬由拱硎南坎入滇之永昌府一路行走迨至拱硎被馱貨野人損壞行李復折回新街改由蠻莫前進於光緒元年正月十三日（一八七五年二月十八）行抵南平河有路人告知護送英員之緬官謂戶宋河有匪徒攔路柏郎惑之馬加理以途皆已經過逕自進發十五日住宿蠻允之緬佛寺次日意欲往迎柏郎行到戶宋河即遇久慣路劫之山匪而通叻臘都等糾約硎夥附以逃硎地匪約百餘人向索過山禮開槍斃其夥匪一名匪衆一齊上前將馬加理及其賓從四人一併殺害劫去隨行馬匹什物緬佛寺內行李看守之漢人一名當時逃去此馬加理在戶宋河被戕之情形也柏郎自馬加理由南平河分身後越日亦即前

進行至雪列地方因行囊食物未到仍回南平留從人石雨田在雪列與馬加理先行帶往後留在彼聽信之通事李含興等候前途消息柏郎於十七日在班西山下被衆三面合圍阻其去路經護送印度緬甸各兵開槍擊斃數人並於後路樹林放火始各潰散其在場目擊者即劫殺馬加理之臘都因南平馱載甚多復糾夥往劫據供其中有就地山匪有內地逃出漢奸及業經正法逆匪李幗論之子李發羽黨不期而會者共約近二千人等語此柏郎在南平河被阻之經過也臣等查英國駐京使臣威妥瑪照會總理衙門所稱馬加理被戕柏郎被阻情形旁觀傳述不無所聞異辭而核其地界及起事日期與臣等所訊各節尙屬相符至照會內稱喀乾人士告知柏郎聞中國官場調兵攔阻一節訊據蔣



宗漢等供稱該處帶兵員弁實無楊姓其人至開化鎮總兵楊玉科是年正月半後始由京回至省城並無干涉又照會內稱攔擊柏郎之漢兵執械吶喊聲言係李協台親侄叔君一節訊據李珍國供稱該革弁全家均死回亂只有族侄李含興此次隨同英員由緬回騰別無子侄名喚叔君及與叔君二字同音之人又照會內稱馬加理被害後割取首級懸掛廳城一節訊據蔣宗漢吳啟亮供稱實無此事衆目昭彰斷難掩飾兇犯臘都等供稱實係殺死後就便拋棄戶宋河內臣等檄飭現署騰越總兵同知等懸賞購求屍首認真設法打撈據稟實因日久漂沒連撈八日之久未能撈獲等語尙屬實情至照內會指稱李珍國串通某頭目攔阻英官不許進入中國及額游客從孟磨起程風聞李珍國已在各

土司地方布置兵勇駐紮各等語經臣瀚章派往密查之總兵李勝親赴騰越蠻允訪查道路之口均稱李珍國所爲而該革弁研訊十餘次始終狡避是以英國使臣威妥瑪照會內所稱喀乾之人士斬取擊斃首級之漢兵又蠻允司棉官函述殺害馬加理之中國人又告誡緬人毋與英人同行之華姓順姓或宗姓劉姓又從騰越下來未進蠻允城夜間人聲嘈雜約帶三四千兵亦係劉姓順姓或宗姓又告知緬國探子俄瑪姓謂由打英人地方回來之中國某姓官員又李珍國在孟磨不允派隊護送額游客時一律阻撓之某頭目又事後未能殺盡英官及跟同之漢人緬人懲辦統兵官之駐蠻允中國楊官員各種情節各項人等均無憑拘傳訊究且照會內亦未能指出名字或名姓俱無勢難將凡與同



姓及毫無把握之人妄拿追究徒滋紛擾惟各路之布置皆李珍國一人之主謀無由治其脅從應即究其主使李珍國雖堅不承認其寄騰城紳衆一函並蔣宗漢吳啟亮亦供事後聞李珍國實有在路布置之事憑証昭然已同鐵案按照衆供確証即同獄成之例子以應得之罪百喙奚辭蔣宗漢吳啟亮訊無調兵攔阻情事李珍國祕謀事前實不知情惟明知英員將由緬甸來滇徒以未據馬加理先期知照未能預籌迎護迨案出以後又不能趕緊拿辦雖後來帶兵捕獲犯贓尙知愧奮究屬疏忽於前業經臣奏參暫行革職野人山地居士司界外匪徒分踞爭雄羣呼爲野人官麇集出沒爲害行旅此次劫阻英員之犯除上年官軍往捕格斃裴六而都而糯雷大裴小陀而敢幹等五十餘名並擒後在騰越監斃六濫幹阿用二名在省監斃麻幹一名又起解在途脫逃藺小紅一名途次因傷身故而挑幹阿弄二名節將解到匪犯而通四臘都而臘惑而肝陸濫當而幹爾同己即而臘而剛幹而挑臘而樣雙施奶等共十一名分別譯訊並未刑求該首犯而通四臘都供認起意糾搶拒殺馬加理及其跟隨四人臘都又供認糾夥前往南平河圖搶柏郎從犯而臘惑而肝陸濫當而幹爾同己即而臘而剛幹而挑臘而樣雙施奶供認戶宋南平兩處分投縱劫各不諱亟應明正典刑庶野匪稍知斂跡緬滇道路可期通暢惟案關中外交涉臣等未便遽行擬結謹將查究詳細情形據實臚陳請旨飭下總理衙門詳慎籌議會同刑部分別定議以成信讞除飭將已革總兵蔣宗漢已革同知吳啟亮妥慎看管已革都



司李珍國及匪犯而通回等十一名分別監禁訊無不合之通事  
李含興交保候傳在逃之匪犯蘭小紅咨由兼管雲貴總督臣岑  
毓英勒緝務獲歸案辦理起獲馬加理馬匹什物共五十六件已  
點交英國參贊格維納等收回取有單據並將全案供招李珍國  
寄紳衆原信咨送總理衙門備查

附全權大臣李鴻章奏

光緒二年七月三十日即  
一八七八年九月十七日

竊臣前奉諭旨派爲全權大臣馳赴煙台與威妥瑪會商一切當  
經奏報於六月廿八日由津乘輪船起程東駛廿九日申刻行抵  
煙台威妥瑪已先到煙七月初三日會晤議商雲南戕害馬加理  
一案該使堅求將全案人證提京覆訊若不允行他事無可商辦  
其注意尤在岑毓英主使謂觀審之格維納由滇回緬沿途查訪

情節更真彼已令格維納於閏五月杪回英面陳又將全案文卷  
證據齎送該國查核約一月內該國必有辦法回信此時即與議  
商仍請咨請本國作主等語臣與反復駁辯以滇案業經欽派大  
員往查訊取供證均確斷無再行提京覆訊之理若必欲提質須  
將所得岑毓英指使文扎信據或的確可靠見證交出查驗當據  
以請旨定奪若聽信傳聞之言並無真憑確證遽將督撫大員提  
審中外各國皆無此辦法該使允將格維納所記簿據譯送日久  
總未交初五初八等日威妥瑪梅輝立來晤十一日臣又赴威妥  
瑪處會商仍執前詞以相抵拒該使又提及去秋在總理衙門議  
定辦滇案優待駐京大臣整頓通商事宜三大端須一併議辦乃  
能結案其慾甚奢而所言甚肆適俄德美法日奧六國駐京使臣



及英德兩國水師提督均會集煙臺臣故示整暇往來談讌並詣其鐵甲大兵船閱看操練該兵官等迎送禮儀恭謹臣因於十二日萬壽聖節邀請各國公使提督至公所燕飲慶賀自威妥瑪以次各舉觴起立稱頌情感頗爲聯絡於是各國使臣公論亦謂無確實憑據擅請提京爲非十三日威妥瑪始允另議辦法謂前在京擬有八條英國臣民皆不滿意現格維訥到後朝議尙未知如何若另想辦法必得此八條所要更多更重方可服英人之心所擬條款須全答應即轉請本國結案不必再說提京等語十五日該使先送來一函堅明要約以條款當通盤合併酌議如不允行決然停議如可允行彼此畫押爲憑臣即覆函以如皆於彼此有益無損各省地方均辦得動自可酌允倘有中國體制所未協力

重辦不到者亦未便勉強允行俟定議後再據情具奏請旨各等語十七日該使來寓先譯述英文大略十八日將譯漢條款送交臣逐加查核其昭雪滇案六條皆總理衙門已經應允惟償款銀數未定其優待往來三條一京外兩國官員會晤禮節似因今春部院大臣往來多未拜會各省督撫接見外國官員儀制互相歧異欲商訂以免爭論一通商各口會審案件一中外辦案觀審兩條可合併參看查近來各口關道與領事雖照約有會審之名仍歸承審者定斷會辦亦屬虛文若照所擬分別妥議定章或稍經久觀審一節亦經總理衙門於八條內允行矣至通商事務原擬七條一通商各口請定不應抽收洋貨釐金之界並欲在沿海沿江沿湖地面添設口岸該使以道光廿二年江寧和約第十款英



國貨物在海關納稅後准中國商人徧運天下經過內地納關照舊輕納不得增加等語厥後因此議改子口稅爲他口毫不另徵之據是第一子口似應在內地舊設常關處所遂謂必須離海口數十里或百十里定爲子口界址其界內免再收洋貨釐捐名爲照約似亦近情臣查各省釐捐多在通商口岸百貨鱗集之所若准定子口界所失過多斷不可行一請添口岸分作三項以重慶宜昌溫州蕪湖北海五處爲領事官駐紮湖口沙市水東三處爲稅務司分駐安慶大通武穴陸溪口岳州碼斯爲輪船上下客商貨物長江一帶究欲一網打盡用意極爲貪狡以上二條係該國注意多年所必欲得者疊與總理衙門議論未就本年德國修約又囑令合力要求幾有不允不休之勢一洋藥准在新關併納稅

釐一洋貨半稅單請定畫一款式華洋商人均准領單洋商運土貨出口商定防弊章程一洋貨運回外國訂明存票年限一香港會訂巡船收稅章程一各口未定租界請再議訂以上五條如洋藥釐捐由新關併徵既免偷漏亦可隨時加增土貨報單嚴定章程冀免影射冒騙諸弊香港妥議收稅辦法均尙與中國課餉有益其餘亦與條約不背該使又擬明年派員赴西藏探路請給護照因不便附入滇案優待通商三端之內故列爲專條臣緣該使先既約定各條須通盤合併酌議有允有不允則即停議恐又事敗垂成因就其稍可通融者酌量允行改添字句免滋弊混而全力專注免定口界添設口岸兩事與之反覆爭論該使忽允忽翻自十九日起逐日會議至二十四日彼乃肯確允免定口界僅於



租界免抽洋貨釐金臣查洋人租界爲地無幾各通商口岸惟上海租界有抽釐局卡他處釐局皆在租界之外且指明洋貨則土貨仍可抽收將來洋藥加徵稍資撥補似於大局無甚妨礙至添口岸一節總理衙門已允宜昌溫州北海三處赫德續請添蕪湖口亦經臣奏准在案今仍持前議准添四口作爲領事官駐紮處所其重慶派英員駐寓總理衙門已於八條內議准未便即作口岸臣知川江峽灘險阻輪船萬不能行姑聲明俟輪船能上駛時再行議辦至沿江不通商口岸上下客商貨物一節自長江開碼頭後輪船隨處停泊載人運物因未明定章程礙難禁阻該使既必欲議准似不在停泊處所之多寡要在口岸內地之分明臣今與訂上下貨物皆用民船起卸仍照內地定章除洋貨稅單查驗

免釐有報單之土貨只准上船不准卸賣其餘應完稅釐由地方官一律妥辦等語是與民船載貨查收釐金者一律旋與赫德密商據稱如此辦理該總稅司敢保洋稅毫無偷漏釐課並無耗損只須各地方關卡員役查察嚴密耳該使先請湖口等九處臣與釐定廣東之水東係沿海地方不准驟開此禁岳州距江稍遠不准繚越行走姑允沿江之大通安慶湖口武穴陸溪沙市六處輪船可暫停泊悉照內地抽徵章程臣復與法國使臣巴蘭德議及該國條約添口即照英國定議辦理亦一舉兩得之計也威妥瑪諄請半年後開辦口岸俾英人知滇案有此貼補早沾利益租界免洋貨釐洋藥並納釐稅須與各國會商再行開辦因准另爲一條倘以後各國不允亦於我無損至派員赴西藏探路一節將來



恐有棘手而條約應准遊歷亦無阻止之理臣於原議內添由總理衙門駐藏大臣查度情形字樣並與言明如有阻滯切勿勉強致有後悔該使頗以爲然屆時應由總理衙門妥慎籌酌縱難阻其弗往但囑沿途加意護送自無他虞其餘節目關係尙輕茲爲迅速結案起見未便過於拘執致因小故或生他變迨至議義就緒商及滇案償款一節該使謂不敢白專須請本國定數惟去冬專爲此事調來飛游幫大兵船四隻保護商民計船費已近百萬難保不向中國討取等語意極閃爍臣謂兩國並未失和無認償兵費之例諄囑其定數仍可結束庶幾一了百了該使謂吳淞鐵路正滋口舌如臣能調停主持彼即担代仍照原議二十萬臣思鐵路一事洋商既經購地興築豈肯中廢若久擱置亦屬可虞當允派員往商該使遂欣然定議矣因訂於二十六日率同中日在事各員齊集公所將繕就會議條款華英文各四份校對無訛彼此畫押蓋印互換（下略）

### 中英緬甸之交涉

中緬關係已詳前卷邊裔考中至英緬關係之發生蓋在英併印度以後英併印度印緬鄰接時生齟齬道光六年英國興兵於南緬即下緬甸（Lower Burma）克之與緬王締結媾和條約割阿薩密阿拉干地那西林三州爲英領土英即併南緬於英屬印度而置北緬即上緬甸（Upper Burma）爲英勢力範圍英既得南緬頗引起法國之嫉清光緒初年間法侵越南日愈露骨因懼英國勢力北伸法亦由東京向緬甸東部侵入光緒十年法與緬結攻守同盟之約法



國代緬王禁覬覦王位之王兄緬王以湄公河以東之領土割讓與法國爲酬報英法勢力之膨漲暗爭日烈英遂決定併吞北緬會緬王與孟買英商緬甸商業會社有債務糾紛緬判令英商歇業印度總督爲之調停緬王不應英遂興兵攻全緬克之時光緒十一年正中法越南之役尙未完全結束中法兩國於緬事均無暇計及也方英國之興兵上緬也我駐英公使曾紀澤直督李鴻章均得悉英國對緬之企圖我國所求者只名義上之朝貢列強併吞保護與否概置不問此清季對緬甸藩屬之根本方針也清廷不於英併南緬之時提出緬係朝貢之國之聲明已屬誤事乃於英併北緬之際始諭曾使向英外部聲明緬係朝貢之國英外部先詢中國上邦証據及在緬權利曾使向總署詢乾隆五十五年所賜緬王金印式樣轉交

英外部閱看以爲屬邦憑據英因慮法侵緬不允存緬經曾使力爭外相沙力德伯侯爵允另立王管教不管政照舊貢獻中國英則攝政以防外患總署對此已無異議曾使方擬與英外部商拓界事忽聞英外相更換不肯踐言另議緬甸貢事由緬督備前王應貢之物派員呈進又八募不允歸我但英允於大盈江北讓一股歸我使我得航伊落瓦底江且得通海南掌等處仍歸於我我國正值中法越南之役對緬事轉圜旣不能抗議亦無效更無再訴諸武力之可能况當時正李鴻章傾全力應付中日朝鮮問題之時因此對緬事暫行停議適值英人以芝罘條約內專條派人入藏堅請我國允行總署恐另生枝節遂與英妥協了結緬事光緒十二年六月十七日總署與英前署使臣歐格訥商訂草約五條即由我出使大臣劉瑞芬



在倫敦互換是即中英緬甸條約列後

一因緬甸每屆十年向有派員呈進方物成例英國允由緬甸最大之大臣每屆十年派員循例舉行其所派之人應選緬甸國人

一中國允英國在緬甸現時所秉一切政權均聽其便

一中緬邊界應由中英兩國派員會同勘定其邊界通商事宜亦應另立專章彼此保護振興

一煙台條約另議專條派員入藏一事現因中國察看情形諸多窒礙英國允即停止至英國欲在藏印邊界議辦通商應由中國體察情形設法勸導振興商務如果可行再行妥議章程儘多窒礙難行英國亦不催問

一本約立定由兩國特派大臣在中國京城將約文漢文英文各三份先行畫押蓋用印章恭候兩國御筆批准在於英國京城速行互換以昭信守

附總署奏與英使訂立緬甸條約摺

總理各國事務慶親王奕劻等奏為奏聞請旨事竊臣等溯查緬甸一國自乾隆五十九年稱臣內附每屆十年進貢一次迨至道光初年以後緬甸與英國通商將西邊沿海一帶地方讓與英國管理嗣以商務兵爭緬非英敵英遂將其南邊一帶地方逐漸侵佔前數年間緬甸又私與法國議定條約自法國侵佔越南因由越南之西貢可達緬甸南境又取道南掌可窺緬之東北對緬亦頗生覬覦英人恐法人效其所為即不能獨專其利因於上年秋



聞借緬王判英國木商歇業之事構衅稱兵劫遷其主於北印度而佔據其地夫緬甸既已臣服我朝而此數十年間與英人私讓地方與法人私立條約從未入告疆臣奏達天聽是其罔知大體自外生成致遭禍變咎由自取本可不必過問惟究係我屬服之邦一旦被英人翦滅國體攸關因即迭次電致出使大臣曾紀澤與英國外部力爭務在存緬甸之祀立孟氏之後臣等亦以此說與英國署使臣歐格訥力爲辯論並將乾隆年間頒賜印文及緬王歷屆進貢表文方物等年分數目鈔錄寄交曾紀澤轉交英國外部閱看謂此即緬甸爲我屬國之的據萬不能任令外人滅絕彼此論說舌敝唇焦始據曾紀澤電稱英國外部有另立教王不管緬甸政令之說乃未幾而英國更換外部前說頓作罷論臣又



設關通商等語竊思緬甸全境爲英所佔緬人既不能自圖恢復中國又不值涉遠窮兵輕啓邊釁且英人方謀入藏恐致別起事端爲患尤重因就其來議緬事先杜其入藏之請兩相抵制反覆辯論英使乃允停止入藏祇求在藏印邊界通商仍由中國體察情形再行商議如有窒礙亦不急於開辦臣等又以緬甸總督派員赴華並未明言貢獻語涉含糊英使謂若言貢獻有失彼國之體臣等仍堅持不允乃添入呈貢方物循例舉行之語尙屬得體詳察英人之意蓋以緬事不了則滇邊商務不能開辦洋人志在圖利故急求商定恐我不允其請謂煙台條約已有滇省邊界與緬甸地方來往通商一節派員會同商定之文是滇邊通商終難拒絕至入藏一事彼若執意前往辦理殊爲棘手今幸仰仗聖主威德英人克就範圍既與國體無傷且可紓西藏之患利害相權似可就此了結因與英國前署使臣歐格訥商訂草約五條俟命下之日彼此互換（下略）

光緒十二年六月十七日奉旨依議